

11. Tage lang/ vnd salbe damit die Haar/ so werden sie wunderbarlich/ vnd gleich dem Golde schön. Vnd wenn man das Angesichte fünf Tage lang an einander damit schmieret/ wird es fast lauter klar vnd schön.

Item/ nim Geismilch/ vnd nehe die Haar damit.

Item/ nim 8. vnzen Rebenaschen/ 2. M. Gerstenstro/ 1. vnz süß Holz/ das siede in ein groß maß Wasser/ laß wol kälten/ vnd wasche das Haupt mit dieser abgeseigeten Lauge/ vnd laß es von jm selber trucknen.

Ein Wasser das Haar lang/ gelb/ glänzlich/ vnd das Angesicht schön zu machen?

Nim Speck/ so viel du wilt/ schneide in fast klein mit einem Messer/ stosse ihn in einem steinern Mörstel/ biß er gleich einem Teige wird/ darnach distillier ihn/ so hastu ein weiß Wasser/ das Haar/ vnd Angesicht damit zu waschen.

Ein Öl das Haar gelb zu machen?

Nim Öl von Honig distillirt/ Öl von Eyserschalen/ ana mische es durch einander/ vnd salbe das Haar damit.

Item/ füll ein Glas voll Wüllkraut/ wol vermache/ an die Sonn gesetzt/ so schmelzet es zu Öl/ das brauch mit der Bürsten/ das macht gelb vnd schön lang Haar wachsen.

Ein ander gelb Haar zu machen?

Nim der aussen Rinden von den Nüssen/ die innern Rinden von den Nuhbäumen/ jedes so viel gnug ist/ koche es in Wasser/ vnd mische darunter Alaun/ Gallöpffel/ mache darauß eine Lauge/ bestreich damit das Haar/ zuvor mit ander Lauge gewaschen/ darnach binde darauß die Bletter/ 2. Tage lang/ hernach strele das Haupt damit/ was am Haar hengt/ laß es abfallen/ vnd salbe es mit